

PRESEADIS INSEGNANTIS E PRESEÂTS INSEGNANTS

De Liste regionâl pal insegnament de lenghe furlane

UN INVÎT A PARTECIPÂ

ae Zornade formative

“99 PERAULIS PAR FEVELÂ CUL MONT”

LUNIS AI 20 DI AVRÎL dal 2015 DES 16.00 AES 19.00

Tal Auditorium de Region in vie Sabbadini a Udin

L’Assessorât pe istruzion de Region Friûl Vignesie Julie adun cu la Agenzie Regionâl pe Lenghe Furlane e in colaborazion cul Uffici Scolastic Regionâl e la Universitât dal Friûl a organizin un gnûf moment formatîf par presentâ l’ultin materiâl didatic plurilengâl sostignût de ARLeF e realizât di Silvana Schiavi Fachin cu la cjase editore Futura: **99 PERAULIS_Fevelâ cul mont_parlare col mondo_talking to the world.**

Te ocasion al vignarà presentât il gnûf **Cors di perfezionament e di inzornament** pai insegnants di lenghe furlane **“Lenghe furlane te scuele plurilengâl_Lingua friulana nella scuola plurilingue”** inmaneât de Universitât dal Friûl cu la poie de Region F.V.J.

In presince de Assessore regionâl pe istruzion Loredana Panariti, dal Retôr de Universitât dal Friûl Alberto Felice De Toni, de Ispetore dal Uffici Scolastic Regionâl Paola Floreancig e dal President de Agenzie Regionâl pe Lenghe Furlane Lorenzo Fabbro, si fasarà il pont sui disvilups e lis voris inviadis a pro dal insegnament dal furlan a scuele, de formazion pai insegnants e dal lôr ricognossiment professionâl e formatîf.

A ducj i participants, a conclusion de zornade, al vignarà dât l’ *Atestât di frecuence*, une copie di 99 Peraulis_Fevelâ cul Mont e altris materiâi didatics e informatîfs.

Par partecipâ si à di iscrivisi confermant la presince dentri di joibe ai 16 di Avrîl (specificant non, cognon e numar di telefon) a cheste direzion: arlef@regione.fvg.it

Tal câs che dopo la scjadince des iscrizions a sedin ancjemò puescj disponibii, la Arlef e fasarà buinis ancje lis iscrizions rivadis dopo la date ultime. In ogni câs ducj i iscrits a varan une mail di conferme te stesse direzion che a àn mandade la note di iscrizion.

99 PERAULIS: Fevelâ cul mont, Parlare col mondo, Talking to the world, editât di Futura Edizioni e realizât di Silvana Schiavi Fachin cul jutori de ARLeF al è un strument didatic in forme di scjatule, cun 99 cjartis di zûc e ancjetantis peraulis dissegnadis dai fantats dal Centri Diurni Punto Zero cu la colaborazion de ilustradore Patrizia Geremia. **99 Peraulis** al promôf la educazion pluriculturâl e interculturâl tant che fonde di un percors educatîf plurilengâl e al è pensât par judâ i frutins e i fantats des nestris scuelis a cressi cence pregiudizis e stereotips, ma ancje braurôs dai valôrs alts de lôr tradizion storiche e culturâl. Lis peraulis, i proverbis, lis cjançons... a son declinâts in 15 lenghis: cun di fat l’obietîf didatic al è chel di puartâ i fruts de scuele de infanzie e primarie, in maniere divertente, ae discuvierite graduâl des analogjiis e des diferencis che a esistin fra lis diferentis visions dal mont, i diviers compuartaments, lis credincis e lis opinions dai

popui de Tiere e a ricognossi lis corrispondencis o lis diferencis che a esistin jenfri i elements lessicâi che lis lenghis a doprin par pandi la diversitât culturâl e di pinsîr. L'ûs didatic dal zûc al pues partî dai dissens par scuvierzi ce che i fruts a san za su lis robis o su lis ilustrazions, lassantjur che a fevelin te lenghe che a cognossin miôr: par furlan o talian, ma ancje doprant chê altris lenghis che a fevelin a cjase (par esempi un dialet locâl o di une altre region, une altre lenghe dal teritori tant che il sloven o il todesc) o une des lenghis de gnove imigrazion (l'albanês, il cravuat, il rumen).

Te zornade di lunis ai 20 di Avrîl il materiâl al vignarà presentât de autore Silvana Schiavi Fachin proponint diferentis modalitâts di ûs didatic.

LENGHE FURLANE TE SCUELE PLURILENGÂL: cors di perfezionament e di inzornament par insegnants:

Il cors universitari, inmaneât de Universitât dal Friûl pal a.a. 2014/2015 al tacarà cui prin incuintris joibe ai 14 di Mai e si sierarà tal mêis di Dicembar dal 2015: Il cors si svilupe tai dopodismisdis, cun impegnis diferenziâts vie pal an, e al previôt 300 oris di formazion dividudis in leziions, laboratoris, seminaris e elaborât finâl par un totâl di 30 credits formatîfs. Lis iscriziions si sierin ai 7 di Mai dal 2015.

Te zornade dai 20 al vignarà distribuît materiâl informatîf specific e presentât il cors tai details dal Diretôr dal cors. Mauro Pascolini

Par informazions:

Arlef_Agjenzie Regjonâl pe Lenghe Furlane

Vie Prefeture 13 – 33100 Udin

Tel .0432 555812

arlef@regione.fvg.it

www.arlef.it